

# Post da podest per ils Incantanti

■ (cp) **La dumengia passada èn sa participads las 25 chantaduras ed ils chantadurs dal ensembl vocal Incantanti a la 10avla concurrenza per chors svizzers ad Aarau per cumpeter cun auters chors per in bun post ella classificaziun. Quai è medemamain stada la producziun finala da lur «Turnea da Concurrenza 2017».**

La preparaziun durant in entir onn che ha purtà success als Incantanti en las concurrenzas internaziunalas ad Assisi (Italia) ed a Riga (Lettonia) è stada drizzada particularmain sin la competiziun d'Aarau. Sunter las davosas provas da sonda en il Zunfthaus zur Waage a Turitg èn ils Grischuns s'entupads la damaun baud ad in ensolver comunabel ad Aarau. Alura èn vegnidas stgaudadas las vuschs, fatgas endament anc ina giada passaschas centralas da las chanzuns, coordinà las midadas da posiziuns e focussà mentalmain l'attenziun sin il mument decisiv. La preschentaziun da concurrenza en il center da congress e cultura ha cumpiglià quatter chanzuns en divers stils, tranter quellas era la cumposiziun d'incumbensa «Aurora» da Gion Giusep Derungs, da l'onn 2016. Als

Incantanti èsi reussì da sa producir en il mument decisiv cun ina prestaziun maximala, sco gia a chaschun dals European Choir Games a Riga. Er en la preschen-

taziun da ses repertori suandanta han las giuvnas vuschs grischunas pudì persvader l'auditori cun lur intunaziun netta e precisun cantica. Per la victoria n'hai

tuttina betga bastà. En la stretga classificaziun da la categoria chors da giuvenils han ils Incantanti la finala cuntanschì l'excellent terz post. La differenza tar il

chor victur dal Conservatori da Winterthur emporat be 0,7 puncts. Lezza producziun è vegnida validada cun 58 da 60 puncts. Ultra dals Incantanti è er sa plazà sin il quart post il Chor da giuvenils Grischun cun ina prestaziun solida.

Cun la victoria en la categoria chors maschdads da l'enssembl vocal Consonus, che stat sut la direcziun da l'anterior chantadur dals Incantanti Mauro Ursprung, ha quel mussà la qualitat e la gronda prestaziun dal chant choral grischun.

A la fin dal concerts dals premiads èn ils Incantanti vegnids sorprendids d'in'ulteriura distincziun: L'auditori ha elegi ils giuvenils Grischuns cun il premi dal public. Quest premi è per ils Incantanti gist uschè custaivel sco il post da podest cuntanschì. Cun quai han els cuntanschì la pli auta finamira dad «incantare» - dad intngantar auditoras ed auditurs.

**La proxima preschentaziun dals Incantanti è a ses concert da Nadal che ha lieu ils 12 da december a las uras 20.00 en la Heiligkreuzkirche a Cuira.**



**La posiziun finala dal chor da giuvenils Incantanti a chaschun da la preschentaziun dal repertori ad Aarau.**